

Ben, son contento de poei dî che l'inpegno o gh'é stæto. Oua tocca a niatri, e in particolare a mi, de inbastî 'n progetto e d'anâlo a prezentâ in Comun. Pe-i mogogni no ve preocupæ: a nostra vice prescidente Maria Vietz a ghe l'à cantæ in rimma, comme poei leze in pö ciù avanti. Ecco cöse ò dito a-a sciâ Scindico Marta Vincenzi a quæ, me fa piaxe de dîlo, a m'à risposto in zeneize!

Sciâ Scindico

Qst'anno chi tocca a mi, comme neuvo prescidente da Compagna, de fâ i mogogni in nomme di çitadin de Zena. Solo pe quest'anno, lasciò i tutti mogogni a-a nostra vice-prescidente Maria Vietz perché ancheu m'é ciù cao de fâghe 'na propòsta chi, davanti a tutta Zena.

Ma però, foscia 'n mogogno devo propio fâlo. E za! Sciâ vedde, quando son introu in Pâxo da De Ferrari... Eben quel'erbo! O l'é li secco secco, speronsiò... Mi penso che mette 'n erbo in ciassa o se fasse pe fâ alegrîa, pe rende contenti i çitadin e i foresti che l'amian. Ma quello cöso... E poi 'na çitæ comme Zena, che pe oltre setteçento anni a l'é stæta a capitale de 'n stato (tutta a nostra bella Liguria e quarcösa de ciù sciben che ancheu quæxi nisciun o se l'aregôrda ciù) a dovieiva meritâ quarcös'atro! Pâ che l'unica cösa in sciâ quæ no se risparmi segge o costo di parcheggi! M'ân vosciûo dî che chi a Zena gh'emmo i posteggi ciù cai do mondo! Scinn-a a Londra se spende de meno e a Sann-a (saluto i amixi da Canpanassa de Sann-a che son vegnu chi a-atrovane) se spende meno che a meitæ.

Ben, già che te regia, in mogogno l'ò fæto mi ascì... Ma vegnimmo a-a promissa che veuggio scheuve da Vosciâ. Quando son vegnuo pre-

scidente da Compagna ò vosciuo pigiâme l'inpegno no solo de difende a nostra bella lengoa zeneize, ma d'atrovâ de stradde pe rilanciâla, pe fâla tornâ a vive, pe no perde, de chi a trent'anni, un grandiscimo patrimonio: a lengoa di nostri poæ ch'a l'é vegnu quella ch'a l'é inte quæxi mille anni de vitta: l'Anonimo Zeneize o scriveiva in "volgare genovese" za a-a fin do mille duxento, propio into mentre o Dante o l'ea apreuvo a scrive in "volgare italico" a Divinn-a Comedia. E da aloa o gh'à 'na letiatûa scritta ch'a l'ariva scinn-a a giornâ d'ancheu.

O zeneize e l'insemme de tutte e parlæ da Liguria o l'é definio "Lingua regionale o minoritaria" da-a "Carta Europea delle Lingue Regionali o minoritarie" e o gh'à scinn-a o seu bravo "codice ISO 639-3" dæto solo a-e lengoe: pe quelle de Liguria o codice o l'é LIJ, pe l'italian IT, per l'ingleize EN e via discorindo.

Pe tutto quello ch'ò dito scinn-a chi me sento de domandaghe chi in Pâxo, davanti a tutta Zena, 'n inpegno precizo da seu aministraçion pe-o rilancio do nostro zeneize. Dæto pe seguio che bezeugna atrovâ e meglio stradde pe fâlo, mi me domando perché, tanto pe 'ncominsâ, no se pösse mandâ i "nonni" che san parlâ zeneize inti azili (ancheu se ciaman scheue materne) a stâ apreuvo a-i figeu segondo e indicaçioin de mestre parlandoghe zeneize. Son seguio che se domando chi, oua, chi l'é disponibile, ne trovemmo in muggio! E de badda!

Ben, sciâ Scindico, a Compagna, mi, e tutti i zeneixi, saïemo ben contenti de 'na seu risposta ppositiva. Mi me inpegno za da subito a vegnila a-atrova pe definî insemme e stradde da percorî.

Scignorîa a Vosciâ e a tutti.

FRANCO BAMPI

